

Perillustris et Reverendissime Romine. Magna me laetitia
affecit D. Bartholomaeus Sanctissimi Domini Nostri Cubicularius, cum
te ad episcopatum Cracoviensem electum fuisse significavit: spero
enim id cessurum in magnam Dei gloriam et Ecclesiae utilitatem, te-
que amplissimum campum habiturum, in quo praeclara dona Spiritus
Sancti tibi iam dudum collata exercere valeas. Quis novit, an haec
fuerit causa, cur divina providentia aditum tibi ad Vilmensem epis-
copatum adire noluerit, ut in occasionem praesentem servareris? Gra-
tulator igitur tibi de novo isto honoris incremento, sed magis eccle-
siae Cracoviensi et toti regno Poloniae gratulor. Lator praesen-
tium est Dominus Henricus Suecus, Eques Hierosolimitanus, mihi olim
familiariter notus; eum benignitati tuae commendatum cupio, si qua
in re apud Regem ope tua indiguerit. Precor Deum, ut dona sua in
sancta anima tua conservet, et augeat; et ego vicissim a te peto, ut
memor veteris amicitiae nostrae, me apud Deum precibus tuis iuves.
Romae etc.

Fuligatti, Epp. famil. XVIII